

拙齋小集 詩

四

香文書院

和書門		
二六五〇五號	一〇五函	一册
類		
四册		

內閣文庫	
二六五〇五號	一〇五函
四册	一册
和書類	

詩集文集

新

內閣文庫	
番號	和 26505
冊數	4 (4)
函號	206 334



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





拙齋小集卷之四

五言古

偶作

水府 青山延于著

淺草文庫

結宇依林丘、開軒俯水流、清風與明月、常來為我儔、
渾是會心處、怡然自忘憂、鴻鴈泊煙渚、孤帆隱沙洲、
優遊從所適、富貴非我求、搦翰代耒耜、攤書擬封侯、
窮通固有命、貧賤何所羞、

寄渡邊君

澹澹清江水、靄靄春山暮、千里遙相思、空望江南路、

魚躍綠楊津、鶯啼芳草渡、徒起川上歎、看惜青春去、
却憶十年前、翰苑共相遇、君為黠額鱗、我為枯轍鮒、
一從忝識拔、幸蒙明主顧、却憶十年後、浮萍異散聚、
君為人中龍、我為草中兔、潛伏深自晦、常懷陷穽懼、
窮通由否泰、消長係隆污、芳年難再得、白駒何可駐、
丹心忽易摧、鬢髮將變素、判取得與失、不管毀與譽、
大塊如蓬旅、人生如寄寓、苟得脫羈絆、何須學老圃、
感君眷顧厚、聊得抒情素、君看英雄士、自古在韋布、
關雉飽膏粱、沐猴著紈袴、禪蟲良可厭、達觀真可慕、
誰知五柳門、此中自成趣、

次渡邊公雲見寄韻却寄

歸鴻傳帛書、忽下海東雲、慙勤叙平生、展玩到夜分、
憶君少年日、湖上醉紅裙、紅裙今何在、夢想徒紛紜、
今春遊墨水、忽憶仙湖濱、裁詩寄故人、相思何其殷、
詞鋒排工部、筆法揖右軍、憶君在政府、勤渠究朝曛、
萬物同熙熙、華木皆欣欣、雅俗不相容、真如蕕與薰、
織人巧羅織、貝錦爛成紋、謹論世爭詆、流言人共聞、
誰知鸞鳳侶、久困燕雀群、一朝去政府、涉獵屈宋文、
風派兼儒雅、尚憶舊詞盟、春遊試勝具、斗酒聽倉庚、
新詩投同好、妙理兼品評、英才策駟耳、文囿欲爭衡、

梅花方馥郁、冰肌入詩清、高標本出衆、寧容口舌爭、
緬想都下興、花間並轡行、雲山阻且遠、安得慰離情、
西山見落月、詩筒問郵程、四美常難兼、二難何可并、
仙湖春將暮、杖藜促吟鞋、山櫻迎我笑、幽賞屬吾儕、
白雲加粧點、山巔又水涯、愛茲好時節、爛醉暢幽懷、
垂釣箕水麋、賒酒金市街、山水忘世慮、百愁自可排、
請君同此意、情好終不乖、

再用前韻寄渡邊君

昔人說神仙、御風又乘雲、已無貴賤別、又無長幼分、
宇宙以為宅、煙霞以為裙、不知時治亂、何況世紛紜、

或在山之阿、或在水之濱、不羨唐與虞、不論周與殷、
駕龍騭青蚪、歛如蚩尤軍、搏桑見日出、弱水看日曛、
崑崙宴王母、便嬛心所欣、飲我以瓊漿、樂酣酒又醺、
揚旆為我舞、微風動蘭薰、上被阿錫衣、下垂霧縠紋、
靈媧時鼓瑟、縹緲空外聞、神仙真可慕、寧同蜉蝣群、
慙慙為君語、且莫拘禮文、青松存顏色、何負金石盟、
依違固後機、勇決貴先庚、醉鄉有勝地、可以免官評、
黃雀窺螳螂、喜君解銓衡、既已同波流、無為論濁清、
狺狺名利徒、磨牙共相爭、衆煦搖山嶽、安得大道行、
反覆及此事、悒鬱傷中情、徘徊極遙矚、相思阻修程、

忽傳故人書、感喜交相并、此時步庭隅、落花滿青鞋、
黃鶯來作侶、綠竹好為儕、落日沉高樹、歸鷹入雲涯、
時為神僊歌、更慰達士懷、細草青纈地、垂楊綠拂街、
陶然醒復醉、窮愁不須排、前言如可履、交情庶不乖、

又次前韻

明鏡暗纖塵、白日蔽浮雲、藁本亂麋蕪、邪正固難分、
章甫或薦履、錦衣或為裙、小人常得志、世事殊紛紜、
吾憶青雲士、遠在江水濱、心為報國瘁、憂因憤世殷、
高情懷魯連、談笑却三軍、謀謨佐明主、危坐到夕曛、
君臣魚水合、相得共欣欣、同朝皆仄目、恰似醉醺醺、

難奈鮑魚臭、忽奪蘭麝薰、萋斐如笙簧、巧言鏤冰紋、
謗燄一何熾、浸淫漸上聞、騶虞雖曰珍、難容鹿豕群、
高才以讒去、事功託空文、交遊皆絕迹、不記舊日盟、
當其趨附日、瓦礫可為庚、去就炎涼異、寧願鄉黨評、
今我寒門子、戢翼掩茅衡、矯枉而過直、激濁又揚清、
擯斥已自分、毀譽不敢爭、君子辱納交、待我比鷹行、
的知鮑林意、長存故舊情、賦詩酬知己、何歎隔遙程、
追想昔遊事、悄然感慨并、獨坐懸一榻、閑步著雙鞋、
放歌唯自適、踈狂誰與儕、城西新卜築、近臨河水涯、
汲泉灌藥圃、酌酒豁胃懷、草肥調馬埒、花綻觀田街、

畫靜燕泥落，天長鴈字排。德音君不忘，應酬我何乖。

佐藤一齋曰：長篇三疊，益出益奇，才力富贍，匪夷攸思。

寄懷渡邊君

用老杜渭北春天樹江東日暮雲二句為韻

嘗聞室町末，海內方鼎沸。慶元戢干戈，鬱滯回元氣。天將開文運，宗室生俊偉。親禮白屋士，不挾軒冕貴。遺賢擢築巖，耆老起釣渭。銳意創修史，首置史官職。直筆誅姦諛，大義懼亂賊。輕重主神器，皇統辨南北。編摩將竣業，太歲忽在辰。義公以元祿庚辰薨，故用鄭玄故事。筆削亡名士，訂正付後人。文苑漸蓊塞，儒風不復振。爾來束高閣，經歷幾回春。憶昨享和初，先公體祖

先丹鉛親下筆，警校手披編。誓將修志表，鏤板天下

傳。知君通文史，提舉委任專。公論革舊弊，謹議破拘

攣。督責嚴課程，攷覈極精研。殺青行將就，適會公

賓天。憐君奉靈樞，辛苦千里路。佇立極哀慟，泪灑墓

邊樹。時維屬嚴冬，風寒霜雪降。揮泣辭水府，啣哀歸

武江。今公初嗣位，百事法義公。勵精講治道，恰

如日昇東。股肱選英才，擢君參機密。蹇蹇懷匪躬，直

道斯儔匹。黜陟抑僥倖，淘汰先覈實。大綱既已舉，功

成期不日。乘此際遇時，取彼群少怒。人情如趨市，好

朝而惡暮。宵人伺釁隙，含沙欲中君。浮言滿朝野，物

議何紛紛、一朝解機務、脫去蘭省芬、門前雀堪羅、沙
上鷗為群、今公鏤國史、已動天天朝聞、縹緗裝
卷帙、銀函具表文、客冬已進呈、勅旨降紫宸、報
生覩盛事、念君疇昔勤、賦詩寓所懷、編縷叙云云、請
君幸勿訝、吐情比獻芹、聊假飛鴻信、遠寄武江雲、
雪夜荒川生見訪、因賦得在字
積素滿堦除、寒光照臥內、未迴山陰棹、空憶剡溪戴、
忽喜故人至、剪燭共相對、貧家無所有、徒供園中菜、
酌酒叙生平、握手論文態、輕薄良可憎、杜門謝時輩、
百憂緣何寫、惟有杜康在、殷勤勸故人、可以澆磊塊、

七夕前一日、侍宴于尚古閣、景山公子得祝
字、賜延于令賦之、謹賦古風一篇、
良夜會詞臣、嘉賓滿華屋、清風動蘭薰、綺席香馥郁、
仰看麟趾化、振振及公族、賤臣陪下風、敢效華封祝、
二月五日季子生、賦以記喜、
我年四十五、又見季子生、已非龍馬種、又非太白精、
伯仲齡稍長、叔季數始盈、衰門雖不振、教育可期成、
樂天且安命、不必問前程、
七言古
寄秋德卿

少小締交如弟兄，緩急為許死與生。豈期一別各萍梗，我遊東武君西京。東武西京三千里，雙鯉惟傳書一紙。一紙緘書何覩縷，說破王畿佳山水。畿內山水窮天下，月有桂河花醍醐。羨君遊屨事濟勝，羨君足迹遍寰區。男兒如是真得意，何必折腰就官途。余亦生平抱傲骨，常慕南山采薇蕨。何當歸來將尊酒，與君共醉故園月。

庚申中秋淫雨新霽獨酌遣興

花難得美日，醉月難得良。夜晴天於花，月常相妬。適逢良辰多雨聲，更知人事不如意。且拚俗務苦相縈。

今宵有酒與誰醉，可憐江月向人明。金尊獨酌影為侶，秋風掃空天晶熒。酌月吟風兩得意，利名不論草芥輕。一壺酒一巨觥，我將與爾了一生。杯裏清光翫不盡，乍聞雞聲報五更。徘徊中庭徒從倚，銀漢西轉月影傾。

石思甫挽歌

余昔讀書谷子塾，與君同學各相親。一劍交遊十餘載，車必挂轡坐同茵。弱冠初入翰墨場，與君切劘攻文章。討論抵掌不相下，我好先秦君漢唐。楊馬菁華韓柳奇，步驟別決無所遺。夜光曾探驪龍窟，雲錦昔

裁織女絲、轉眄之間成異世、九原茫茫不可求、人間
乍失麒麟手、天上俄脩白玉樓、交遊黯澹一夢中、昔
時遺響托悲風、古來有才多不壽、唐有長吉漢終童、
終童長吉皆豪傑、至今生氣尚凜冽、嗟思甫自古誰
長生、唯有文章傳英名、思甫文章足不朽、塵土何得
埋其精、徘徊北山阿、涕淚雙滂沱、聊將絮酒酬舊誼、
君若有知聽哀歌、
蕉花杯歌 并序
本藩騎將白井君嘗種芭蕉數株、今年始開花矣、令
其姪谷子享請予詩、乃為歌贈之、

騎將風流愛幽居、庭種芭蕉四五株、閒來無事獨開
卷、綠葉映日影扶疎、紅女機中織成布、皎如長江帶
煙霧、服之清輕宜暑月、滿袖涼氣貯冰雪、蕉布能令
人身輕、欲叩天閭朝玉京、君不見芭蕉百年始開花、
花片為杯酌流霞、王母蟠桃安期棗、何如蕉花杯、使
人長不老、又不見東門黃犬華亭鶴、富貴不若貧賤
樂、始知留侯能避穀、始知彭澤能辭祿、何日為築糟
丘臺、與君俱醉蕉花杯、

東海篇

八月廣陵通大潮、海若乘秋萬馬驕、大洗磯頭風卷

雪皎如織女展龍綃萬頃鯨波湧虛空海內奇觀此
 地雄輕颿出沒鵬霄外重樓搖動蜃氣中雷聲忽度
 千門雨鼇背時浮萬里風日暮海天懸素影燦如雲
 衢開玉鏡蒼茫奇觀頃吏改礮上雪華發晶彩此夜
 高樓盛宴開坐上頻傾鸚鵡盃盤中鱸魚玉作膾尊
 裏蒲萄金為醅即今相逢真可樂百年人生能幾回
 襟懷一洗飛揚甚潦倒不知玉山頹大洗礮名

漁父詞

百歲漁翁不梳頭日日江湖逐白鷗南浦桃花西浦
 柳朝曝漁網暮維舟晚潮初落烟月白孤雲忽去數

峯幽一瓢一醉意自足款乃一聲下中流

壬戌夏余罷史生謝絕交游既而再入史館一

二舊文來謀講書明年閏正月再開講筵諸子

來會講訖賦詩得落字

吾黨交遊何寂寞十載舊盟不負約文園講業人無
 恙詞客揮毫情不薄已無下物助雅談唯有苦茶換
 杯酌夜深誰將玉笛吹曲裏春風梅花落

寶劔歌

錕鍔出良鐵百鍊擅神奇淬將清漳水磨用陰山砥
 傳是英將玉轡韁寶環錯落赤珊瑚憶昔燕然建奇

勲沙場百戰血紛紛、紫電朝橫三尺水、青萍夜拂七星文、壯士報國仗一劍、鋒刃至今點無玷、霜銜凜凜開芙蓉、精光澹澹截蛟龍、坐上一揮飛霹靂、鱗缺倚天氣冥濛、何論天下英雄士、不羨麒麟閣上人、惟恨升平鎖寶匣、未斬漢庭一佞臣、

倒生藤行送野敬卿歸野州

君不見平氏西走據八島、陸列城柵水艤幢、源將乘勝如破竹、颺馳電掃指行宮、麾下材官萬猛士、陸戰水攻各爭鋒、城兵不料東軍至、忽見煙燭蔽蒼穹、風急火熾拒不得、宮殿焚蕩一時空、平將狼狽浮滄海、

龍舟無復六軍從、皇家美人名玉蟲、手持紈扇樹舟中、嬌態雅容麾敵射、紈扇畫日夕陽紅、源將下令募射手、爭推秩父平重忠、秩父挽強不敢當、三軍壯士思焦胷、那須名士藤宗隆、年纔十七意氣雄、擘弓空中墜飛鳥、射藝天下稱無雙、鞍門受命辭不獲、攬轡橫弓立沙磧、白馬紫韉錦鞍韉、金甲烏帽紅抹額、春風吹海卷波浪、紈扇搖搖萬頃上、凝視默禱指鬼神、湏臾波定點無塵、砰然一簇中紈扇、紈扇飄颺舞海波、兩軍貔貅注目看、撫掌扣舷各稱嗟、世移時異陵谷變、人間惟說八島戰、宗隆聲名磨不泯、千載凜凜

如見面野州壯士字敬卿為余談此到五更言是野
州恩田邑土人尚祀宗隆靈依然祠下倒生藤龍蟠
蜿蜒勢飛騰昔時宗隆挿馬策至今茂盛見威稜莫
說源平蝸牛爭惟有壯士傳英名區區富貴何足慕
平臺為墟鎌府荆嗚呼倒生藤千古獨滋榮我今賦
此送子行意氣慷慨飛巨觥興闌樓頭月將傾把臂
惜別對前楹憐汝壯志佩長劍何須役役過一生丈
夫當自圖不朽人間榮辱不足驚

仲春過藤子定宅宴梅樹下戲為長歌

得無

梅香巷東梅數株老幹槎牙根半枯欲倒不倒橫墻

角恰如蟄龍蜿蜒蟠坤隅其他孫枝皆殊態傍籬侵
檐密又踈二月春光欲駘蕩一時著花抽芳膏主人
此時宴羽徒沽酒割鮮盡歡娛春風吹樹翻白雪石
上斑斑花若鋪皎如素娥飄輕裾祭如漢女擎明珠
又如飛僊騎白鳳徑渡銀漢入天都香氣馥郁嚴衣
袂黃鳥繞樹相喧呼羲馭駸駸不可駐釀酒啣杯日
欲晡君昔宦游在東都抗鱗獲罪還奮廬門庭寂莫
絕人迹我時訪君酌玉壺居諸荏苒十餘載隙駒倏
忽若電驅今日相逢高堂上我鬢既禿君白鬚梅花
獻笑不改色昔時交游今半無得失原同塞翁馬浮

沉渾似水中鳧，人生有酒須盡醉。何用汲汲利名拘，
我今勸君酒，為君歌巴歛。請君為我飲一盃，夷齊
躡骨皆枯，醉中何知辨賢愚。與君痛飲梅花下，玉山
欲倒任人扶。

豐神童歌 并序

余嘗歷覽古今之史，其夙慧穎悟，若甘羅黃琬孔融
王戎之倫，不為不多。然而至天才絕倫，能屬文辭，屢
屢乎無幾矣。若夫徐勉六歲為祈禱文，李賀七歲為
高軒過，劉晏八歲獻東封書，班固九歲能文辭，蘇世
長十歲上周武書，楊億十一作賦，陸典十二作柳賦。

天下稱為奇才，在本朝則插廣相九歲為應制詩，
管公十一為五言詩，當時稱為神童。元寬以來，文運
蔚興，鵜真昌十歲為古詩，木順庵十三為太平頌，水
足生十六遺徂徠書，海內嘖嘖稱為奇才。其後寥寥
無聞焉。至近時，吾友藤田子定十三為赤水翁壽序，
遐迩傳誦以為異才。夫以西土文獻之盛，早歲能文
之士，屢屢如彼，而商推本朝亦屢屢如此，則人才
之難從可知也。今春上巳，余過子定宅，見豐神童者，
年纔十三，能屬文。子定試出元史使讀之，五行並下，
一覽輒解。既而又出客歲所作雜文數篇示余，余受

而讀之、理致清遠、機軸出己、自成一篇文章、文字非步驟雕琢者之所能及也、人才之美、未見其比、嗟呼、文運否塞、人才凋弊、而荒壤僻邑、乃生若異材、可謂奇矣、蓋我上公、負不世之姿、才德夙成、則神童之出、天意必有在焉、斯豈可不賀哉、遂為歌云、
君不見豐氏神童年十三、天才夙成青出藍、胸中貫穿通今古、歷世治亂已盡諳、下筆頃刻數千言、渾成毫無斧鑿痕、意氣應須傾筆海、文勢直欲壓詞壇、借問神童何許人、言是治北坂上村、父在農間耕且牧、損貲買書與兒讀、余聽其言尤嗟異、誰知英材生山

谷、元氣鬱勃山谷中、孕祥毓瑞為我公、天才若此真絕倫、異時必當為國珍、噫嘻大器自古貴、晚成厚蓄慎勿求利名、

垂絲櫻引并序

夫物得所托而後著、故甘棠以召伯而存、嘉樹回宣子而傳、古栢以武侯而鬱茂、雷竹因萊公而叢生、夫以一卉之細、一物之微、為世愛惜、播諸歌詠、著諸文辭、使千載之後、興起贊歎者、豈非以其人哉、若本邦大石氏、精忠貫金石、義氣動天地、宇宙之大、罕見其比、宜乎後世欽慕而不已也、大石氏仕播州赤穗、

迄今故宅猶存、園中有垂絲櫻、枝葉扶疏、茂盛可愛、
蓋其所嘗愛云、好事之士徵詩於四方、欲歌詠其事、
以傳不朽、嗟夫、大石氏之忠烈、天下之所共知、宜亘
萬世而不朽、固不係於此樹之存不存矣、然思其人
則愛其樹、猶周人之於召伯、宋人之於萊公、則邦
人思慕之心、其有不可已者歟、夫一國之所慕、天下
慕之、則重義尚節之風、亦將迺及天下、是大有益於
世教也、因作垂絲櫻引、

元祿辛巳歲、賜死赤穗侯、忿爭一坐法、恨不殺仇讐、
赤穗有臣姓大石、慷慨誓將報主仇、潛匿獨唱同志

士、歃血結盟為主謀、赤穗由來稱好士、群臣皆要相
終始、一朝國亡城為墟、肉食偷生惜一死、纔得壯士
四十七、義氣相合各如一、借問當時仇是誰、野州長
史姓是吉、邸第不許人出入、防閑日日嚴且密、伺間
覘隙運奇籌、破關排門忽復讐、時維嚴冬十二月、北
風凜冽寒裂霄、臂上角弓霜皎潔、腰間寶劍血糝糊、
提首間行獻侯墓、衣袖淋漓淚不乾、釋兵詣官願就
死、觀者闐巷咸悲酸、石氏父子尤絕倫、忠肝激烈泣
鬼神、物換星移人代改、故國尚有第宅存、昔時遺愛
留櫻樹、垂條依舊媚青春、紅線隨風花織錦、瓊葩鋪

地草成茵君不見權門貴戚百歲後玉樓委地骨亦
朽一時富貴隨流水園池不知何處是嗟此一櫻樹
結根托忠良海內文士錦繡腸遐迩相傳脩詞章請
看忠義扶名教英名千載與花芳

湊河行并序

余嘗讀史策至於楠公之死節未嘗不廢書而歎也
嗟呼以公之才略濟以忠義而計終不行繼之以死
豈非天耶蓋自公之薨也迄今五百年矣天下之愚
夫愚婦皆能知公之名稱公之忠非忠義之感人心
安能若此哉余於是乎有感焉作湊河行

君不見元弘天子播遷日四海分崩如鼎沸六
軍纔保笠置城夢賚忠臣真良弼燕見一陳恢復計
誓滅逆賊期康濟豈圖賊師陷行宮翠華北狩孤島
中孤臣獨保金剛山金城鐵壁杳難攀百萬賊軍勢
吃勃盡銳竭精攻不拔天助王室生忠勇一掃逆
賊傾巢穴忽迎鑾輿返京師鐘虞依然復舊物楠公
殊勲誰能匹中興論功功第一招婦傾城振古然逆
敵一朝復滔天戰艦蔽海逼皇畿一受帝命圖
距之借箸慇懃陳奇策無奈忠謨與帝違薄暮
馳至櫻井驛解劍與子見肝膈肝膈披瀝何所言遺

命諄諄清廷氛孤軍直赴湊河灣鐵馬奮戰甲朱殷
 一死原分濺腔血忼慨授命沙磧間嗟呼楠公生為
 忠義臣死為忠義鬼星霜荏苒五百歲至今凜凜有
 生氣英雄事業已消亡猶傳湊河古戰場千里路阻
 不可訪欲弔忠魂淚縱橫

五言律
 冬日牡丹
 百卉已凋傷孤芳別有鄉雕欄籠曉日翠幄護嚴霜
 嬌餘吳國豔色鬪漢宮粧歲寒能玉立不必競春光

春日遊友人池亭

孤亭春雨後煙景最相宜翠羽鳴高樹金鱗躍綠池
 醉吟傾舊榼逸興入新詩愛此濠梁樂世人何得知

春日遊太子山
 亭高出林表登眺好開窓石磴通幽處雲山帶暮江
 波光動危堞帆影落長杠相值何辭醉春醅滿玉缸

夏日雜詠二十首
 空近溪邊水步穿蓮下苔篁深抽紫籜林靜落黃梅
 急雨來涼氣歸雲送晚雷杳然遺物我長嘯獨徘徊
 獨窮達生理已作葛天民靈槓含風重槿花帶露新
 山林自成性杖履即無塵來往渾閑事野服與綸巾

蕭々繞簷竹、漠々上階苔、總此幽閒裡、日添佳趣來、
生平唯冗物、事業只銜杯、本自忘機者、沙鷗莫謾猜、
坐卧青山近、回溪曲々通、午陰移薜荔、日色冷梧桐、
水響朱絃外、龍吟玉笛中、梅花試一弄、嚙嚙入江風、
雖無超世趣、尚愛草茅居、寂寞交遊絕、顛狂禮法踈、
看山青眼裏、對竹黑甜餘、自掃窓前石、臨池學草書、
厭茲夏日熱、閑步敲荆扉、江黑蛟龍動、山明霹靂飛、
雨驅炎氣去、風促晚涼歸、不羨列御寇、冷然透葛衣、
館閣曠書日、偶得數旬閑、徐步林丘下、靜吟泉石間、
無心雲出岫、求侶鳥鳴山、日夕多幽景、處々納涼還、

午睡幽林下、從佗夏日長、槐陰來翠色、泉響洗炎光、
風竹衣衫冷、池荷枕簟香、悠然一夢裏、不識熟黃梁、
移竹幽陰密、疏泉細運分、總銜出山月、簷駐度溪雲、
樹古門無轍、苔清石有紋、焚香默坐久、會得老莊文、
幽懷屬涼夜、勝地獨相尋、不辭詩中趣、安知物外心、
空潭印明月、虛閣撫清琴、誰是同心者、共投冠上簪、
小築開幽迳、庭園步々迷、山光凝紫翠、水色動玻璃、
倚几繙書帙、疏泉灌藥畦、冷官真得意、不必問雲棲、
野館臨谿竹、沙村卧水橋、晚煙浮橘柚、夜雨滴芭蕉、
睡夢疑飛蝶、閑居勝珥貂、人生貴適意、所慕在漁樵、

杉竹無炎暑，踈慵每晏興。花澆半瓶水，瓜割一盤冰。
荒迳生芳杜，崩崖垂古藤。斯心誰共晤，山月向東升。
水石帶餘清，新涼趁晚晴。池邊多月色，松下半秋聲。
團扇羅紈薄，暑衣絺綌輕。何須論得失，世事一碁枰。
尤愛池亭好，偏憐炎熱微。芰荷浮翠蓋，菡萏綻紅衣。
衝岸金鱗躍，當簾白鷺飛。芋田三百畝，喜見雨餘肥。
雨過南澗口，徒倚意無端。落日沈高樹，歸雲滅遠巒。
彩虹晴漸沒，皓月影將團。樓上清輝遍，還疑是廣寒。
清風侵卧內，明月上高齋。謾羨風前思，還攜月下懷。
窮通唯自適，行止不吾乖。踈竹與流水，幽情寄翠崖。

夏雲興大壑，終日在山隈。碑兀危岑合，崔巍重閣開。
莫言膏寸物，還滿太壺來。安起泥蟠士，沛然潤草萊。
微風吹晚波，釣艇發清歌。水閣偏宜夏，新涼不厭多。
卷簾依靜渚，移席就煙莎。百頃空潭曲，褰衣掬嫦娥。
自愛幽棲趣，更無車馬譁。黃葵傾日葉，紫綬向秋花。
夜冷蟬離樹，林踈月上紗。却嫌名與利，不種東陵瓜。
立秋前一日會梧桐樓
相逢又何夕，大火欲西流。卷幔涼侵坐，開窓月近樓。
金風樹中起，玉露葉間浮。不問梧桐落，明朝是立秋。

夏日遊友人莊

為避人間熱，更開林下筵。叢中抽綠笋，池上綻紅蓮。
石與棋枰淨，苔因杖履穿。相逢各才俊，不羨晉群賢。

負郭城西宅，枕流湖北家。庭移數竿竹，園種四時花。
幽徑抽蘭葉，勾欄護藥芽。悠然心自愜，閑坐獨煎茶。

春日田家二首

細柳蔽清渠，春波動碧雲。輕風秀隴麥，膏雨長畦蔬。
犬吠花間屋，蠶眠桑下廬。方知農務急，處處餉新畬。
田家春日好，閑步訪幽居。蟻動村醪熟，繭成蠶箔虛。
溪邊傍花釣，柳畔帶煙鋤。却憶於陵子，當時獨灌蔬。

晚過柳堤

仙湖二月時，春色十分奇。鶯織桃花錦，風繅楊柳絲。
暮煙籠遠渚，落日浴清漪。却恨長堤盡，閑吟步更遲。

九月十三夜賞月

年光何荏苒，五值武昌秋。玉露侵衣冷，銀河入戶流。
啣盃聊解悶，對月却添愁。不分嫦娥影，終宵照白頭。

舊居即事

脩竹千竿徑，柔桑數畝居。客稀車轍絕，門鎖雀羅疎。
禍福塞翁馬，功名黔地驢。削縑已殫盡，無意賦歸歟。

乙未元日

江北玄陰盡，海東初日昇。花薰半枝雪，風解一池冰。
臘釀濃宜醉，晴窓暄可凭。明時竟何補，只合謝無能。
五言排律

登寅賓閣

高樓臨巨浸，萬里望雄哉。日月鼇頭出，乾坤鵬際開。
入窓雲嶠小，當檻雪山頽。帆影青天盡，雷聲赤岸迴。
鯨魚搖作雨，蜃氣結成臺。鳴鼓馮夷出，泣珠鮫客來。
千秋泛海興，八月觀濤盃。欲下枚生筆，羞無七葉才。

正月十八日賜宴史館

翰林賜宴日，館閣醉花辰。恩重楚王醴，寵優梁苑賓。

芳尊斟綠酒，玉縷贈金鱗。華輿紅霞動，歌蕪白雪新。
柳條絲未結，草色軟相勻。移席鶯啼樹，褰簾香襲人。
冲融從化遠，黻毓沐恩頻。脩史千秋業，多才一代珍。
緝熙覩君德，鼓舞仰經綸。幸藉維持力，斯文庶不淪。
奉挽先君文公

分茅受青土，開府撫東州。位統藩屏重，身當天下憂。
親承邦國託，坐運廟堂謀。柱石威名大，彌綸錫命優。
謳歌聞舜禹，輔導仰伊周。史筆繼先緒，文章宣大猷。
風聲被四海，功德冠諸侯。星墜俄傳變，山鳴方鎖幽。
長辭朱邸裏，歸窆瑞龍頭。望柩人垂淚，迎旒雲帶愁。

玉魚蒙壽域、素幔蔽靈丘、野樹慘無色、岩泉咽自流、
生平忝知遇、侍讀荷恩休、結草徒思效、絲毫愧未酬、

瑞龍 先公墳墓之所、先是山數
震動、土人以為凶徵、既而赴至、

甲寅元日

萬國朝正日、群僚獻壽辰、瑞烟籠畫閣、嫩柳拂芳茵、
玉節開雄鎮、黃麻下紫宸、羽林肅儀衛、甲第引簪紳、
禮樂周宗室、衣冠漢懿親、論文虎觀古、布教象魏新、
襟野貴丹雘、宏猷仰彌綸、體元民戴德、思孝物歸仁、
世業傳良史、貽謀啓後人、菁華蒐百代、筆力挽千鈞、
卓蹕追司馬、殊功繼獲麟、何當鑄琬琰、炳蔚照無垠、

送藤子定之江戶

銀鞍辭水府、寶劍向江城、祖道臨湖水、離筵問路程、
雪含梅蕊淨、風拂柳條輕、對此一盃酒、送君千里行、
詞壇推巨擘、文苑讓先鳴、設醴楚王待、開臺燕主迎、
雄藩今講武、率土已調兵、但願胡塵掃、未聞瀚海清、
廊廟待良策、憑君議北征、時北虜寇邊、莫

己巳之春、上公初就藩、五月二十二日臨彰

考館、賜宴史臣、謹賦一律、

恩賜南皮宴、陪遊西苑庭、蘭肴滿朱豆、桂醕瀉銀餅、
竹影金鞍駐、松陰華蓋停、登堂禮俊士、端服拜文星、

稽古崇儒術、維新仰德馨、山河何恃險、畋獵豈荒寧、
理國待賢相、究心在聖經、薰蕕舊異器、清濁湏分注、
祖範存儀表、遺風見典刑、藹藹如有訪、聊欲瀆清聽、

七言律

春日遊神崎寺

金壘美酒綠葡萄、今日相逢氣轉豪、千里陰晴遙嶽
雨、一堤分派大湖濤、沙村行踏汀邊草、山徑春迷洞
口桃、幾弄鶯花忘日暮、景情寫得入揮毫、

藤子定見訪、因賦、次子定韻、

茅亭新築碧谿邊、一望憑高轉渺然、霞外山光收宿

雨、樹間帆影落晴川、清風自和瑤琴響、妙曲都無白
雪傳、歡樂幾時湏盡醉、鐘聲乍送夕陽天、

奉送東里先生使京

千里鶯啼花又芳、金鞭遙指帝王鄉、風流堪問周文
獻、朝禮親觀漢典章、季子論詩知往古、長卿攤傳有
輝光、雄飛已遂平生志、莫恨春風縮綠楊、

送藤子定之京

湖上春風李與桃、離筵偏勸玉壺醪、凌雲元抱飛騰
志、探勝何論跋涉勞、意氣中原堪睥睨、文章海內本
雄豪、三都到處君能賦、更見英名日下高、

那珂港望岩船浮圖
塔勢崑崙聳碧穹、海門縹緲蕊珠宮、金鱗晴上桃花
水、白鷺群飛楊柳風、樹擁丹崖山色暗、波搖寶刹夕
陽紅、杳然偏覺人寰遠、直到蓬萊咫尺中、

秋曰漫興 五首

一謝交遊萬事疎、薜蘿藤蔓掩幽居、橋邊齒齒花開
日、井畔梧桐葉落初、以月浮槎懷博望、千年題柱想
相如、即今狗監應難遇、敢向人間賦子虛、

疎松攢石自相佳、漫擬華陽隱士家、杖履時開幽澗
竹、桔槔新灌小園花、綠芋風度田千畝、青荇波搖水

一涯、解道浮生無定所、欲將身事付魚鰕、

溪上高亭對翠微、幽情獨臥白雲扉、山窓盡日薔薇
掩、澗徑無人杜若肥、踪跡稍兼塵世遠、疎慵轉與物
情違、徜徉偏愛閒中趣、羞我江湖未拂衣、
碧水潺湲曲徑通、登樓徙倚思無窮、庭松露濕偏含
翠、野樹花深欲墜紅、戶外芭蕉聞急雨、池邊荷葉引
清風、興來漫步乘晴處、秋月初升古洞東、
孤亭琴月晚涼通、滿目秋光入賦中、弱冠文章羞篆
刻、當年志氣慕英雄、雲臺殊遇今何在、碣石盛筵人
已空、顯達由來渾是命、浮生豈復歎途窮、


仲秋下那珂江
扁舟盪槳下驚湍、八月長風對罄歡、一片青山鵬際落、雙崖丹巘鏡中看、無邊海色連天盡、不斷江聲懸雨寒、漢使星槎如可擬、飄然凌浪問雲端、

薄暮至那珂港、捨舟登陸、遂至磯濱、陰雨俄至、
為賞中秋此倚闌、浮雲黯澹思無端、蟾蜍不辨樓頭色、蟋蟀頻生戶外寒、萬里海烟迷巨浸、孤村風雨亂驚瀾、何當更借僊梯手、翻作廣寒宮裏看、
望海樓贈高子大

千里羈愁君自寬、旗亭綠酒罄交歡、金壘原壓大官羨、玉膾堪供上客餐、回首鯨波空外湧、憑欄蜃氣雨中寒、風雲縱少南樓興、不負廣陵八月看、
九月十三夜會此君堂
萬里長天掛素輝、林間返照尚熹微、仙人陂上秋陰盡、楊柳堤南鳥鵲飛、世路艱危何足問、社中雅會莫相違、興來偏訝蟾宮近、無限輕寒襲客衣、
正月十三日入彰考館呈同僚諸君
新成高館早春開、上客風流珠履來、魯國千年藏蚪斗、渥洼當日見龍媒、簡編原富名山祕、英妙仍餘大

國才軍識日先公遺業在于今文燄照芸臺
 疎松密竹繞堦除負郭城西一畝廬日暖花間穿雪
 鳥風輕河畔上冰魚紅歸洞壑霞光曉綠入池塘柳
 眼舒總為韶華添雅興自開臘釀對琴書
 秋日偶作
 倜儻梁園一薄官窮來無恙竹皮冠衣裁荷芰秋光
 冷劔淬芙蓉星彩寒虛抱雲霄千里志寧懷雀鷄半
 枝安人生幾許難遭遇坐惜西風老蕙蘭
 早發松戶關

蚤發關門道路通弄縵猶憶漢終童晨光欲動江東
 樹月色初沈雲外峯千里雄心雙缺劔三秋羈思一
 飄蓬目斷故園何處是無邊煙黛碧重
 丁巳秋余遊東武聞國家方有北顧之憂慨然
 賦此
 三尺青萍七尺躬鐵肝常慕漢時雄請纓徒抱終軍
 憤汗馬原期驃騎功百年狂態風塵外一代文章意
 氣中今日制邊應有策莫將宴息侮胡戎
 冬日會遊文館
 是日尾藩平洲先生本藩東里
 先生及肥後筑後諸子至
 堂上金尊照綺筵風流不讓漢諸賢千秋經術推名



世一日交遊托忘年，寒梅白破窗前雪。苦竹綠浮牆
外煙，誰道龍門難可到，憑君今夕忝周旋。
紅葉
休言金谷鬪豪奢，羅綺今時何足誇。剪綵春回隋苑
樹，餘紅秋染武陵花。爛斑幾處皆為錦，縹緲誰家盡
作霞。為有吳娃妖艷色，不教桃李競繁華。

送村子隣之江戶 二首

高亭送別屬年闌，意氣何論道路難。波嶽蒼烟馬頭
起，芙蓉白雪客中看。孤闌夜月聽雞度，二總曉風吹
鷹寒。聞說江南春色早，梅花新映紫金鞍。

迢遞雲山向武陽，離筵分手別愁長。金盞新浮橘柚
影，綠醅初瀉醪醕香。玉鞍齊映千峰雪，白馬行嘶十
月霜。為報壯年須努力，豈論兒女泣河梁。

仲夏游太子山

高亭百尺俯迴溪，十里青山望不迷。雲壑水聲絃上
響，湖天日色鏡中低。晴虹半斷飛橋外，急雨忽過睥
睨西。總為主人能愛客，玉缸何處重相携。

歲暮書懷

人間忙裏易蹉跎，十九星霜一瞬過。伏櫪由來悲不
遇，擊壺空自發狂歌。千秋事業仍難就，萬里雄心竟

若何傲骨平生無所屈，優游願得老巖阿。
人間壬戌之夏，余初補一官，罷史職，獻贈藤子定，不
同憲憶昔稱金蘭，萍散何圖著武冠。十年徒守書生
業，一命初霑步從官。才慙屈產悲年長，勢失輔車愁
齒寒。誰識雞群容野鶴，孤鳴不復舊時看。
孟夏會朱舜水講堂
徵君祠廟倚江皋，文墨相逢不厭勞。幽澗莓苔供臥
榻，遙峯翠黛入揮毫。天邊過雨收暝色，松下清風送
晚濤。庶洞猶餘書院在，長令斯道屬吾曹。
乙丑秋移居鳴珂里，僑寓無聊，賦以寫思，十首

三十春光轉眄空，秋風海上幾行鴻。雨過幽徑莓苔
綠，霜染荒庭柿葉紅。蟋蟀敲寒草，廬月芙蓉花老故
園叢。生平未試屠龍技，猶憶鉛刀一割功。
梧桐露滴夜光凝，萬里西風銀藻澄。眼裏弟兄誰舊
識，樓頭風月是良朋。細看交態冷於水，且厭簿書同
逐蠅。何事秋來尤得意，芸窗閑挑一籠燈。
秋風葉落鴈聲悲，駒隙偏驚時序移。躑躅猶纏荼毒
苦，伶仃空感蒹葭詩。滑甘原欠當年養，風樹還乖夙
昔期。齷齪何須戀棧豆，羸餘今日復奚為。
笑吾牢落老彫蟲，恤緯徒懷婺婦忠。海內元輕韋帶

士人間誰識草茅雄、蠅營爭逐錐刀利、尸位寧圖久
遠功、如值廟堂盱食日、不知何策待西戎、

十載浮沈家作桴、先生踪迹寄江湖、誰知夢鹿醒還
失、遮莫移山愚且迂、架上蒲萄珠錯落、石間苔蘚錦
糝糊、去丰買得立錐地、却笑今年錐也無、

去歲移居城北郭、今年又賃屋南隣、經霜黃果離
熟、衰露紅花點、新疎竹長松、宜與侶、白雲明月好
相親、可憐雞犬無常主、猶認佗人作主人、

憲澹心恬物自輕、新居無事不須營、含飴穉子迎人
語、求食遊禽繞舍鳴、灌圃澆花忘倦畝、栽松移竹轉

幽清、晚來尤愛秋風入、却作春潮帶雨聲、
清貧多病兩相兼、懶性惟於勢利恬、迎客眼中青又
白、枕書窓下黑、初甜籬邊黃菊、花侵砌、叢裏紫蘭香
入簾、風拂林端雲去盡、秣山忽現一峯尖、
人情世路最巉巖、好是沈淪避謗讒、安步苦吟唯自
遣、虛名浮譽又何饒、開書一任嬰兒戲、種黍時看鳥
雀銜、丹桂紫蘭間枳棘、蓬蒿滿地不勝芟、
儒生生計一何難、問舍求居未少安、漏屋頽垣秋色
冷、荒園廢圃曉霜寒、珊瑚光綴南天燭、風雨聲傳北
海瀾、誰識貧家還富貴、添成蜀錦滿林丹、

仲春同館僚諸君飲藤子定宅時子定將赴江
會京賦以贈別
提携共訪故人居湖上寒梅花發初對酒世途堪感
慨問君邊事定何如孤城雪色屯營外萬里雲山攬
轡餘男子今逢投筆日何須分手更躊躇
仲春遊僊湖
杖藜閑步敲荆扉野蕪山肴興不違汀上鷗鷺隨浪
動洲邊鷗鷺近人飛林花欺雪香侵座春水如藍綠
染衣卜晝休言未卜夜暫時游賞不容歸
客歲本藩以所鏤刻國史獻諸天朝既而

關白藤公特傳勅旨嘉歎寔曠世之盛事臣
延于從事史館觀斯盛事不勝恐喜之至恭賦

二首

大邦文運應文昌史冊今看獻
石室祕輜軒舊發名山藏縹緗偏借雲霄色編簡新
懸日月光一自九天經睿賞長令斯道護綱常
特筆嘗聞寶器重同文今仰神州清祕府進呈經百
揆內朝觀覽厯重明皇情想見勤勞切天眷行
期堂搆成異日須令鍾鼎上梓橋媿羨勃鴻名
送人歸甲斐

虬空百戰威稜肅然在令人感歎思無窮傳云此刀

原之役所佩故起句及之

初月十日

誰向雲端畫彩眉纖於柳葉細於絲鈎光映水遊魚散弓勢橫林宿鳥疑羈客看來愁轉切離人望處睡應遲羅衣掩扇情無限正是簷間欲落時

癸未之秋予移家江邨適值重九與菊鵲諸子

約遊愛宕山因憶往年余應召來江戶與高藤

川諸子遊于此距今二十餘年矣當時同遊之

徒或去或亡慨然有感因賦

二十年前遊此地今年今日再登高眼中白面多新識坐上青衿誰舊曹芙蓉西指千秋雪房總東連萬里濤老來短髮何堪帽一任晚風吹客袍

仲冬 景山公子放鷹于小梅別墅以所獲野

鴨忝賜延于不勝感喜謹賦一律

雄志常嫌狃宴安平明跨馬下林巒回風拂地霜鷹疾半月臨溝煙水寒滋味新嘗君子賜糟糠初飽野人餐未有涓埃答殊眷感恩豈啻銘心肝

三月十八日遊墨水賞花

長堤三月探春芳夾路櫻花媚艷陽粉黛繽紛逞妖

態濃紅撩亂鬪新粧、銀鱗拂地飛還落、玉屑侵衣步也香、懶性羞吾負詩債、吟遊今日為君償、

雪中遊東叡山

微醺纔覺敝裘温、冒雪衝寒訪紺園、寶地新開銀世界、瑶池半浸玉乾坤、黃鸝嚙露花無影、白鷺投時水有痕、詩興何須跨驢背、閑吟駐杖到黃昏、

東叡山看花

閑步探芳不厭賒、東山三月鬪繁華、白雲埋谷如無路、紅靄遮峰知有家、天女宮前波濯錦、文珠樓下樹裁霞、昇平免避秦時暴、何羨武陵源上花、

己丑元旦

移居初卜邸東邊、風物融和正月天、白破寒梅疑帶雪、黃黏嫩柳欲含煙、孟傳臘酒飲尤後、春為髮華回最先、謬慚無毫髮補、徒將温飽污儒員、

拜鹿島神宮

深林鬱々古神宮、明德巍然鎮海東、野鶴飛迴華表外、流鶯啼繞瑞籬中、戎衣曾奮冠軍勇、靈劔猶傳開國功、千載長餘雄氣在、銀濤拍岸響松風、

己亥二月

上公治兵於後樂園、行飲至禮、臣延于辱備扈從員、觀此盛事、不勝欣喜、謹賦、

吾公偉略恆圖危，親自治兵試出師。玄幕遮山朝
靄散，金鱗映日宿雲披。庭邊星列雜貅士，池上風翻
龍虎旗。幸值今春行飲至，微臣為賦小戎詩。

壬寅元日

六十六年忙裏過，怪來人事暗蹉跎。玄陰已散城頭
雪，紅旭初升海上霞。柳眼未舒青尚嫩，梅顛欲笑白
逾加。從今期得懸車日，問柳尋梅到酒家。

五言絕句

感遇三首

明珠出東海，握裏祭含英。儻使秦王見，何翅十五城。

鴻鵠鍛翮時，雀鷄狎藩籬。一朝飛霄漢，雀鷄詎得知。
幽蘭生澗底，馥郁吐芳鮮。採之無所贈，佳人隔遠天。

古怨

自懶掃雙蛾，愁來意緒多。開簾花不語，春月照輕羅。
送友人歸山

採藥白雲路，山₃尤可親。還知舊棲處，麋鹿自相馴。
米崎六詠

高鈴山晴嵐

山靄收朝雨，松嵐送晚濤。煖雲晴盡後，突兀一峯高。

白鳥祠古松

蒼松千載古，蒼鬱帶烟霏。欲識威靈在，應看白鳥飛。

額田古城

古壘人行絕，芊綿蔓草深。泫然懷古淚，不待雍門琴。

米崎平田

平田開萬頃，十里稻花香。夕照自相映，蒸成滿目黃。

草池山晚鐘

野僧歸古刹，夕日沒遙峰。精舍在何處，響傳雲外鐘。

鴈繫池落鴈

碧池誰鑿成，傳是鴈池名。年々幾行鴈，自向此中鳴。

好文亭席上分題賦得仙湖紅葉 得入字

霜葉錦如裁，卷簾紅將入。唯恐繫霜後，翻作落花急。

癸卯元日

春似舊年春，人非舊日人。去歲又今歲，來去一何頻。

題湯岐石

登臨碧山上，溫泉箇裏生。空題一片石，欲勒千秋名。

七言絕句

柳堤晚歸

柳鞦風清綠水灣，金絲弄色看堪攀。湖天日暮雲開

處，洗出林端月一彎。

余讀唐史至樂工雷海清事有感因賦此

萬里邊塵滿太空，野煙虛鎖故行宮。當時縫掖關何事，獨遣伶優泣古桐。

聞子規

片之花飛西復東，殘春空恨五更風。子規何事聲之急，月落前山第一峯。

早發江戶歸水戶途中作

行尋詩興弄春光，柳浦桑村帶夕陽。岸上梅花亂如雪，翩跹去草鞋香。

望金雞山

曉色陰陰柳色濃，千山送我綠重重。天工借得丹青

手，描出金雞第一峰。

春日

柳繞疎簾花繞櫳，更聞黃鳥轉春風。誰知造化添新意，多少精神阿閣中。

春日漫興

元日又過人日天，千門楊柳半含烟。人生百歲幾時好，笑把新花插鬢邊。

仙湖春望

東風吹水滿春陂，千片銀冰下岸涯。芳草纔含湖上綠，垂楊未著雨中絲。

墨竹

直節亭、逼苑牆、半含疎雨、半秋光、間來寫出、曾中氣、隨意雲霄千尺長、

春日田家

春渠引水繞平蕪、數畝田園水碓孤、桃花深鎖柴門閉、總是輞川一幅圖、

花下步月

滿園月色望相齊、花影參差步步迷、閑吟不覺前林盡、直到春山數里西、

仲春飲長天祐宅時雨雪新霽春景可喜

江亭雪後興何豪、右把盃觥左把螯、主人休道無匕筋、自下庭堦折碧桃、
宴中主人設葱羹、適無匕筋、因折桃枝以代之、故詩中及之、

壬申元日

災異休言徵應少、定知修省在明君、願將去歲亘天彗、一掃妖氛為瑞雲、

春初試筆

不分春光病裏催、強將吟筆對寒梅、黃鶯似慰愁人意、飛上短牆啼數回、

贈芍藥亭主人、主人素以相劍鳴世、且善磨礱

今茲癸酉仲夏、適遊水府、予有一刀、請君磨之、

頃增精彩因賦一絕以贈之
霜鏢發劄爭賞歎芙蓉三尺湧波瀾從今不用愁炎
熱長佩腰間秋水寒

遊櫻川賞花次楊醫官韻
遲日勝遊櫻水涯滿枝如雪傍溪斜吾曹自似蕊香
蝶看盡春林無限花

酣歌泥飲是生涯笑指青帘竹外斜還知萬物同和
樂魚醉春波蝶醉花

暮春臥病至初夏未愈聽杜鵑有感
殘紅委地綠陰齊夢覺閑窓意轉迷病裏不知春已

盡一聲杜宇喚人啼

乙亥元日十二絕

公主來歸宗子家市朝傳語頌聲譁窈窕元兼爾顯
德召南謾賦王姬車

燕翼由來慶有餘陽春新降紫泥書客歲抄冬將今
春口宣始講學尤知養儲德仰看治本在闡睢

昇平德澤萬方均文化又逢十二春更喜邦家多慶
事恩風并及提封民

門插雙松同習俗人呼萬歲祝年豐女子唱歌飛羽
板男兒戲弄破魔弓本邦之俗孟春植雙松於門外謂之門松又客有自叅河來

者擊鼓舞踊以賀新正謂之萬歲又本邦女子穿無患子以挿羽毛飛用小板謂之羽子男兒執小弓以除不祥謂之破魔弓皆本邦孟春故事故云

化工粧出美人姿梅綻丹唇柳畫眉誰信天公愛騷客盡驅好景入新詩

起著朝衣入廟堂五更漏箭促春光今朝讀祝獨徒

跣告朔誰知存餼羊今年元日延于為太廟讀祝官舊制攝祭官讀祝官皆布衣徒

跣執事皆著鞵而近時攝祭官助祭官皆著襪獨讀祝官徒跣知禮者以為告朔餼羊云

退朝釋服酌春醪醉叩唾壺氣更豪畢竟屠龍成底

用從容自撫備前刀古者劔工多出備前故異邦之書稱曰備前刀今賞劔家所稱

古備前者尤良延于好古劔常佩備前刀故未句及之

隣雞喚夢報清晨滿目韶光特地新從此應須探花

柳好為天地一閑人

頭禿誰憐韓博士行年四十夢中催家人何用問吾

齒笑對屠蘇藍尾盃

春入書堂日上時明窓淨几兩相宜閑展彩箋呵凍

筆小楷謔得賀正詩

爆竹無聲曙色新比門相賀往來頻野豬去歲入城

去兆在今年乙亥春

自知陋學背明時玩愒徒驚歲月移還耻素餐忝微

祿十年不調任人嗤

武陽客舍聞子規

江城四月杜鵑飛，芳草萋萋綠染衣。
望帝何關羈客恨，聲聲為報不如歸。

奉和高松世子夏日舟行高韻

江天日暮挂清輝，水落魚梁波浪微。
畫舸膠沙前不得，停橈更候晚潮歸。

秋日偶成

歸鴻飛盡百花空，感慨何堪對碧叢。
無限春愁猶未歇，秋光已染鴈來紅。

示子延光

少年勤學在專精，璞玉從來貴琢成。
四世箕裘幸得汝，讀書慎勿墜家聲。

柳堤春望

湖邊霽後好經過，楊柳煙籠十里坡。
愛得金絲垂拂水，春風織作麴塵波。

和吉子有留別韻

東西一別又何傷，塵世從來似戲場。
請爾看歌舞地，江南休道是佗鄉。

壬午元日

寒鄉未信暖光回，臘雪猶封墻角梅。
唯有東風憐舊

識慙慙吹送暗香來

那珂港夏夜即事

白雪捲來蒼海灣、金輪晴挂碧雲端、波光洗盡人間
熱、滿袖清風六月寒

遊姥懷磯

日出海門煙霧開、狂瀾捲雪三山頽、姥懷磯上回頭
望、萬里雄風拂面來

上元日與館僚諸子遊梅莊

攜手閑吟野水濱、名園梅蕊滿枝新、容華不似梅華
好、今日人非舊日人

遊水母寺

十里長堤帶夕暉、孤墳依舊枕漁磯、寒梅似訴當年
恨、片片飛來著客衣

賦示諸子

歸途日已暮、月色如畫、濟隅田渡、至八町、陂、顧
望倡樓、燈火星映、歌吹沸天、亦昇平之壯觀也

東叡山看花

春宵一刻直千金、花有清香月有陰、為君試誦坡公
句、叢之樓臺歌管音

去夕陽蒸作滿山霞、

墨水賞花

開吟經過墨河涯、夾路官櫻曲、斜往來絡繹人如織、行盡長堤十里花、

已卯之春、余至武陽、買薔薇花一本、植之邸中、以供愛翫、及歸偶忘之、友人橋本子若取移之、庭中、既而余移居藩邸、子若以薔薇還余、栽培得宜、枝葉滋茂、今年春著花、濃艷仍舊、嫣然媚人、可謂珠還合浦、馬歸晉廐矣、賦一絕、曾買薔薇栽邸舍、歸來孤負幾回春、今日濃紅一仍

舊、嫣然似笑白頭人、

忍池即事

華表巍然天女宮、蒼波縹緲接青空、閑吟更向橋邊望、人在琉璃世界中、

庚寅春三月歸水府途中作

山逶迤雨後奇、櫻花濃淡洗胭脂、歸鄉何用錦衣好、幸及春光爛熳時、

松平公子園亭雪中即事

時亭新成、庭築假山、

高亭新築崖南隅、珠樹玲瓏望更殊、賸有假山簾外趣、削成白玉小香爐、

夏日偶作

新筍數竿出屋長，濃陰掩處午風涼。高樓晝靜眠初醒，金鴨纔銷一炷香。

甲午歲，我上公以臣延于所著皇朝史略，獻

于知恩院法親王，法親王獻諸天朝，

以備乙覽，帝嘉之，使婕妤報書。法親王

上公以其書賜臣延于，以為家琛，陪臣之榮莫

大焉。臣延于不任感激，謹賦一絕。

誰道長安萬里遙，一封瓊簡降雲霄。不是君恩深

似海，史編爭得達天朝。拙齋小集卷之四終

後序

我西山公夙好學，有志於斯文，以明遺老朱舜

水為師，招四方髦彥，躬化傳之體，為一家之言，老

成宿儒，則有野懋齋佐十竹村篁溪，後進則有安

澹泊栗潛，鐸宅觀瀾之後，存六之文，鳴於天下，其

後者宿凋謝，越南谿田錦江之輩，或以待或以文，

皆鳴於一時，然僅三無幾，存六之文衰矣。及先

君文公好學克繼，西山公之志，於是原翠軒

先生以雄俊之才，為一國之木鐸，高坦室，藤幽谷

川，綠野之徒，並出而加以先子存六之文，又

盛而無媿貞享元祿之際也其後諸子相繼而沒
先子歸然獨存於是先子之名益聞於四方先子
為人志氣軒昂胸中廓然自負氣節不以儒生自
居暇則擊劍舞槍馳驅講射以文柔為戒然亦刻
苦讀書不少懈弛是奉家庭之訓也而專攻文辭
肆力班馬其意蓋在成先公之史故畢生精力
亦實竭於此其遇事也危言高論無所回避人或
至面頸發頰是以不為流俗所容亦終不依阿以
求合於世生平常曰予若遇豐太簡之時當與群
豪並駕齊馳萬尹侯豈足言其志氣之豪如此然

而遭文明之世無所展驥足於是叙東照公之
經營勤勞台歎二公之守成恭儉及開國之元
勲輔弼并及戰國之雄豪奇傑以為一家之言欲
洩胸中之所鬱積也以其文論議英叢思致橫溢
簡而不澁豐而不冗道悉雅健清快俊偉絕無塵
俗之氣俗儒拘學惡其伉直摧沮排斥無所不至
然至其文則終不能掩也嗚呼先子在家則不墜
家庭之訓在邦則欲成先公之史豈非忠與孝
即壽等兄弟續其緒者宜如之何壽以謂先子之
學問文章則伯氏得之翰墨揮灑之妙則仲氏得

之議論俊叢無所回護則叔氏得之壽也不肖無
 所得寸得其武之一端尔不肯竟學今我兄弟相
 共刻勵勤苦以繼其志先子之業庶幾不失墜焉
 然至其氣魄鬱勃光焰逼人則壽等不能彷彿其
 萬一即有斯集之存復何待讚述哉
 弘化二年歲次乙巳暮秋月男延壽謹撰并書

